

զատիճանս քարամբք առանց չաղախի, \10Հ (1741) :

Ի տաճարին Ս. Յարութեան մինչդեռ աւել ածէր Աբրահամ վարդապետ Աստուլլահեան 'ի բաժնին Հայոց, 'ի ներքոյ մեծի կամարին մերձ 'ի Պատանատեղն, հասին 'ի վերայ նորա երեք անձինք 'ի կրօնաւորացն Լատինաց, և սկսան հարկանել զնա բոք չարաչար, և մին 'ի հարուածոց անտի պատահեալ 'ի գլուխ նորին՝ ճեղքեցաւ, և սկսաւ հոսել արիւն հորդ՝ և ինքն անկաւ անդ իբր ըզմեռեալ: Լատին կրօնաւորք ոչ շատացան այնու, այլ 'ի հատաղութենէ իւրեանց, զոր ինչ միանգամ գտին անդ 'ի սոլատուց և 'ի կարասեաց՝ հարեալ զգեանի խորտակեցին՝ ընդ որս և զգրքակալն մեծ եւ զպղնձի շրջանակն Ուժաթափման տեղոյն Ս. Աստուածածնի: Իբրեւ աղբեղեւ Գրիգորի Պատրիարքի որ ինչ միանգամ գործեցին Լատինք 'ի տաճարի անդ՝ արտմեցաւ յոյժ, այլ զի մի՛ առաւել գրգռեսցին Լատինք 'ի յանդգնութիւն, առաքեաց զՊարրիէլ վարդապետ և զԹարգմանն Պօղոս առ դատաւորն, ընդ որս էր և Թարգմանն Յունաց. յանդիման լեալ սոցա յատենի սկսան ամբաստան լինել զկրօնաւորացն Լատինաց և ասեն. տակաւին 'ի սին ամի ընթերցաւ Կայսերական հրովարտակն 'ի լուր ամենեցուն, չհակառակիլ Լատինաց ընդ կրօնաւորս Հայոց, չնկել և չբռնանալ 'ի վերայ իրաւանց նոցա: Եւ զի՝ սովորութիւն է քրիստոնէից մաքրել և աւել ածել զիւրաքանչիւր սեփհական տեղիս 'ի սահմանեալ աւուրս 'ի տաճարի անդ, և 'ի սին աւուր 'ի մաքրել զտեղիս մեր, գործեցին Լատինք զայսպիսի ուճիրս. և արդ խնդրեմք քննել զխնդիրն և դատ առնել ընդ մեզ եւ ընդ Լատինս: Իսկ դատաւորն առաքեաց զուճանս յերեւելի այլազգեաց 'ի Ս. Յարութիւն ստուգել զեղեալսն, և նոքա եկեալ տեսին զտեղին. զԱբրահամ վարդապետ վիրաւոր, զպղնձի շրջանակն հանեալ 'ի տեղոջն և խորտակեալ, և զայլ մլասն. և դարձեալ անտի պատմեցին դատաւորին: Եւ կոչեաց առաջի իւր զկրօնաւորս Լատինաց, եւ եհարց ցնոսա. թէ ընդէ՞ր արարիք զայդ և հեղիք զարիւն առն անմեղի. և նոքա թագուցին զիրան եւ ուրացան առաջի դատաւորին, թէ ոչ երբէք ամբարձեալ է նոցա ձեռս 'ի վերայ ուրուք. այլ միայն կամե-